

武經總要



武經總要

四庫全書珍本初集

子部
兵家類

商務印書館受教育
部中央圖書館籌備
處委託景印故宮博
物院所藏文淵閣本

欽定四庫全書

子部二

武經總要

兵家類

提要

臣等謹案武經總要四十卷宋曾公亮丁度等奉敕撰晁公武讀書後志稱康定中朝廷恐羣帥昧古今之學命公亮等採古兵法及本朝計謀方略凡五年奏御仁宗御製序文其書分前後二集前集制度十五卷邊防五卷

而十六卷十八卷各分上下後集故事十五
卷占候五卷仁宗為守成令主然武事非其
所長公亮等亦但襄贊太平未嫻將略所言
陣法戰具其制彌詳其拘牽彌甚大抵所謂
檢譜角觝也至於諸蕃形勢皆出傳聞所言
道里山川以今日考之亦多刺謬然前集備
一朝之制度後集具歷代之得失亦有足資
考證者讀書後志別載王洙五經聖略十五

卷方寶元中西邊用兵詔洙編祖宗任將用
兵邊防事迹為十二門今已佚南渡以後又
有御前軍器集模一書今惟造甲法二卷造
神臂弓法一卷尚載永樂大典中其餘亦佚
宋一代朝廷修講之書存者惟此編而已固
宜存與史志相叅也乾隆四十六年三月恭
校上

總纂官_臣紀昀_臣陸錫熊_臣孫士毅

總校官臣陸費墀

武經總要仁宗皇帝御製序

朕聞天道尚武示震曜以宣其威國事在戎設營衛以
整其旅輔于文德著之善志自繩契斯革篇牘攸紀古
先哲王維御函夏製軍詰禁去暴誅慢睽乖取象則弧
矢利夫天下師嚴以律則地水制夫剛中周紹夏商建
官最備大司馬總九伐之法以正邦國簡車籍馬悉出
井田之賦治兵振旅先辨其物之用逮夫戰國羣雄競
起任權詐而兼形勢包陰陽而用技巧孫武吳起之說

尉繚穰苴之傳數且百家類分四種刪取要用留侯所以叙兵法也据撫遺逸揚僕所以脩軍政也洪惟三聖開統繼照奮神武以平多壘揚天聲以薄四海豐功美利非可殫紀昨藩臣阻命王師出戎深惟帥領之重恐鮮古今之學命天章閣待制曾公亮等同加編定慮汎覽之難究欲宏綱之畢舉俾夫善將出抗彊敵每畫籌策悉見規模公亮等編削之效寢踰再閏沉深之學莫匪素蘊凡軍旅之政討伐之事經籍所載史冊所記

祖尚仁義次以鈐畧至若本朝戡亂邊防禦侮計謀方畧咸用槩舉且用兵貴乎有紀尚節制也決勝至于無形尚權變也六師練訓四方風土爰從刪正可備廟算也又若營陣法制器械名數攻取之具守拒之用並形圖繪悉以訓釋考星厯辨雲氣刑德孤虛推步占驗行之軍中闕一不可命司天監楊惟德等參考舊說附之于篇共勒成四十卷內制度一十五卷邊防五卷故事十五卷占候五卷目曰武經總要夫前王用兵蓋不得

已以殺止殺殺之可也以戰去戰戰之可也且出提金
鼓付之閫事取鑒成敗可以立功貴伐謀而無倖勝善
統衆而無專勇庶幾識為將之體也尚書工部侍郎參
知政事丁度總領書局適成編綴形于奏請願賜叙引
因言用兵之道有愧博古之能聊以冠篇傳之可久

欽定四庫全書

武經總要前集卷一

宋

曾公亮等撰

制度一

選將

將職

軍制

料兵

選鋒

選能

選將

傳曰有必勝之將無必勝之民又曰君不擇將以其國
與敵也由是言之可不謹諸古者國家雖安必常擇將
擇將之道惟審其才之可用也不以遠而遺不以賤而
棄不以詐而疎不以罪而廢故管仲射鉤齊桓公任之
以霸孟明三敗秦繆公赦之以勝穰苴拔於寒微吳起
用於羈旅張儀之遊蕩樂毅之疎賤孫武之瓦合白起
之世舊韓信之懦怯黥布之徒隸衛青人奴去病假子
諸葛亮不親戎服杜預不便鞍馬謝艾以參軍摧石虜

鄧禹以文學扶漢業李靖用於罪累李勣收於降附是
豈以形貌閥閱計其間哉而庸人論將常視於勇夫勇
者才之偏爾未必無害蓋勇必輕鬪未見所以必取勝
之道也大凡將以五才為體五謹為用所謂五才者一
曰智二曰信三曰仁四曰勇五曰嚴非智不可以料敵
應機非信不可以訓人率下非仁不可以附衆撫士非
勇不可以決謀合戰非嚴不可以服彊齊衆所謂五謹
者一曰理二曰備三曰果四曰誠五曰約理者理衆如

理寡

旌旗有分金鼓有節故一人學戰教成千人

備者出門如見敵

行則整戰陣住

則嚴防守

果者見敵不懷生

傳曰殺敵為果致果為毅

誠者雖克如始戰

宋義謂項梁勝而

約者法令省而不煩

政煩則人擾水濁則魚病法令

將驕卒惰者敗

滋彰盜賊多有

明君知此十者而猶懼取人之難則必設九驗

之言詞以考之為九術之科例以復之所謂九驗者遠

使之以觀其忠近使之以觀其恭繁使之以觀其能卒

然問焉以觀其智急與之期以觀其信委之以貨財以

觀其仁告之以危以觀其節醉之以酒以觀其態雜之

以處以觀其色

君子易觀不肖難明由是驗之可知也

又曰二人交爭則

知曲直二人議論則知道德二人舉重則知有力二人
忿鬪則知勇怯二人俱行則知先後二人治官則知貪
廉所謂九術者一曰道之以德齊之以禮知其飢寒悉
見其勞苦之謂仁將二曰事無苟免不為利撓有死而
榮無生而辱之謂義將三曰貴而不驕勝而不逸賢而
能下剛而能忍之謂禮將四曰奇變不常動靜無端轉
禍為福因危立勝之謂智將五曰進之有重賞退之有